

## NATALE

Cala dicembri, cu tutta la sò nivi,  
Ventu, acqua, negghia e timpurali;  
Lu marinaru cuntrolla, nta li stivi,  
Muturi, cordi, ntinni e scali.  
Sona la nzampugna, tra l'ulivi,  
Lu pasturi risetta l'animali;  
E mentri lu bambineddu cci ricivi,  
Lu pueta vi dici a tutti, Buon Natali!

## LA RIZZA

Armatu di l'attrizzi di lu mari,  
Nta la iazza di la matinata,  
Quannu li pisci fannu la izzata,  
Cercu di piscari.

Spittannu, runchiatu quantu un pugu,  
Lu stessu di lu fari di un ladruni,  
Pi na sicca o un granchiu di schugghiuni,  
Mi mettu dda, pi cugnu.

Isa la russura di lu sulì,  
Specchia l'acqua chiara di lu mari,  
Allongu lu coddu, acchicchiu  
Na rizza caminari.

Calu lu coppu, tuttu nto ncolpu,  
Ci lu nnaculiù, comu vosi Diu,  
Piscu e ghiettu supra la marina  
Na rizza, s'arrimina.

Tagghiata, spaccata, sburiddata,  
Cu stessu cuteddu na fedda di pani,  
Comu fannu tutti li cristiani.  
Era nzucarata.

## LA VICCHIAIA

Mu dicianu, iò un ci critti mai,  
D'un galantomu iunciri a stu statu,  
Ora ci critti, picchè ci arrivai,  
Sugnu comu un numaru 7 addivintatu.  
Lu gustu di li donni mi scurdai  
E pi disgrazia mia ci dormu a latu,  
Megghiu passari trent'anni di guai  
Chi no essiri pi vecchiu taliatu.

## PACECU E LA FESTA DU MILUNI

Cu sti siri, chiarissimi e lucenti,  
Nescinu li pirsuni, tutti quanti.  
È lu tempu di li fistiggiamenti,  
Si godinu l'orchestra e li cantanti,  
Nta li circuli fannu li cummenti:  
Na festa fù bbona, l'otra chiù mpurtanti;  
Pi la festa du miluni raccamatu  
Tuttu lu populu ristau nnammuratu.

Pacecu, tuttu lu populu t'ammira,  
Tu di li festi porti la bannera,  
La cummissioni sappi spenniri la lira  
Cu ordini, saggizza e cu manera.  
E quantu genti c'era cca, dda sira,  
Paria Milanu quannu c'è la fera;  
Lu populu pinzannu ci suspira  
Cu la sfilata siciliana a carrittera.

Viva la festa e viva lu miluni,  
Viva Pacecu cu li sò cristiani,  
Paisi spurgenti supra un turrigghiuni,  
Lu dicinu la Matrici e li campani,  
Madri diletta di stu gran miluni,  
Ch'è lu spassu di l'inglesi e amiricani,  
Cu li so frutta ni fannu un gran baffuni,  
Li nostri miluna su li rè di li suvrani.

Cuntadini, mezzadri e patruna,  
Facemu na sucietà cchiù ricca e sana;  
Mittiti tirrena, siminati miluna,  
Facemu di sta Paceca na suvrana.  
Cu lu benessiri chi lu miluni duna,  
Po darsi sta giuvintù chi s'innacchiana;  
Ognunu virennu sordi s'alliuna;  
Facemu festa e sunamu la campana.

Quantu ntroitu c'è nta lu paisi,  
Camii grossi quantu li casi,  
Cu li stanghetti nfilati tisi tisi,  
Carrichi a cucucciu e puru rasi,  
Vannu girannu citati e paisi,  
Tagghiannu, vinnennu, comu Santu Masi.  
Assicurati sunnu l'utili e li spisi  
Pi la ducizza e quantu sunnu ciaurusi.

A la matina cumencia la caciara,  
Studenti, diplomati e prufissura,  
Spillacchi, bazzarioti e mastri scarpara,  
Vannu a cogghiri miluna di bon'ura.  
E quannu lu boss la summa pripara,  
Ci passanu li stanchizzi e li sudura;  
Facemu n'applausu a tutti sti sinzara,  
A li grussista e a li lavuratura.

E a lu viddanu cu lu zappuneddu,  
Chi simina lu giallu e u bianculiddu,  
Simìna l'arraccamatu e lu purceddu,  
Pi ricavari lu grossu e minutiddu;

L'inzurfara, sconca, s'ammola u ciriveddu,  
Osserva, svulazza comu lu cardiddu.  
Quannu si mangianu sunnu un zuccareddu,  
Ma chi ci nnesta la ducizza d'iddu?

Lu viddanu, chi ogni annu è avvezzu,  
Culpitu da malizia e lu ntrallazzu,  
La Montecatini ci nni mangia un terzu,  
Sempri aumenti chi addiventa pazzu;  
Li miluna vannu sempri o stessu prezzu,  
Ci aumenta lu suduri e purvirazzu.  
Finìu l'estati, spireru li miluna,  
Ristaru serpi, muschitti e muzzicuna.

Saggiu, ubbidienti lu viddanu;  
Lu miluni, l'ogghiu, lu pani, lu vinu,  
Di lu cchiù nicu arriva a lu Suvranu,  
Di lu cchiù ateu all'esseri Divinu.  
Tu si la stidda di lu primu pianu,  
Tu si l'Angiulu, si lu Sarafinu,  
Tu si l'Altari di lu nostru Signuri,  
Tu si la gioia, la paci, lu caluri.

E Paceca si fa sempri chiù granni,  
Cu tutti sti miluna chi produci,  
Lu sò nomi stà scrittu a tutti banni,  
Nta tuttu lu munnu c'è na sula vuci,  
Tuttu lu populu canta sta canzuna:  
Viva Pacecu, la festa e li miluna.

## LA VINNIGNA MARSALISA

Nmezzu li vigni, comu na ciurera,  
Marsala, Rigina di vinnignatura;  
Si mettinu li rimorchi a filanera,  
Na ciurma tagghia, mmezzu la virdura.  
Na marsalisa comu na bannerera,  
Bedda la facci, di milli culura,  
Canta na sturnella a carrittera,  
Rinfrisca lu sulì, rallegra la natura.

Comu luci sta racìna,  
Lu panaru nzucclaratu,  
Lu Signuri sia ludatu,  
La ricchezza è tutta ccà.  
Comu è bedda sta racìna  
Di Marsala e di cuntrada,  
Accussi duci e nzucclarata  
Comu a chista nun ci nn'è.

E mentri cantanu Rosa e Catarina  
Li beddi sturnelli a la rumana,  
Un tagghiu di forbici latina,  
Attona li versi, comu na campana.  
Rasu lu zuccu, la casciana è cchina,  
Ninetta v`acchi l'acqua a la funtana,  
Mentri Ninu ci canta na canzuna,  
Na canzuna d'amuri siciliana.

Ninetta mia quantu si bedda,  
Si comu un mazzu di rosi e ciuri,  
Ninetta mia, tu si l'amuri,  
Senza di tia nun pozzu stà.  
Mmezzu l'ariddi e li cicali,  
Cu l'acqua frisca s'incamìna,  
Comu è duci sta racìna,  
Comu a Marsala nun ci nné.

Arriva lu camiu e puru lu tratturi,  
Li carteddi vannu a sdivacari,  
Cu la cammisa nzuppata di suduri,  
Forza cumpagni chi lu mustu cari.  
La cantina, aperta a tutti l'uri,  
Spremi lu torchiu, senza mai stancari;  
Tra torchiu, pompi e attrizzaturi,  
Si inchinu li cisterni, pari pari.

Tra cisterni e li caputi,  
La sprimuta nzuccharata,  
Ch'è lu suduri di l'annata,  
Si rinchiuri tutta ddà.  
Lu mezzadru, lu patruni,  
Rallegrati nquantità;  
Quannu veni la vinnigna  
Tutta gioia e filicità;  
Chi arrivatu a San Martinu,  
La sprimuta è tutta vinu.

Sta Marsala ciaurusa,  
Virdura, aranci e la racìna,  
Chi fici puru nnammurari  
A lu Rè cu la Rìgina.

Lu duci mustu di li cuntradi  
Di Piddusinu a Racattisi,  
Tuttu lu munnu gusta e loda  
Stu prudottu marsalisi.

Marsala, chi bedda s'è comu un fiurinu,  
Chi ti godi li biddizzi a primu pianu,  
Vistuta tutta di rosi e girsuminu,  
Nnammurata fusti di Rè Suvranu;  
Matri diletta di lu bicchirinu,  
Chi lu surseggia tuttu lu munnu nsanu,  
Sta sira surseggia puru Sarafinu,  
Facennuti un brindisi cu biccheri mmanu.

## CERCU PANI

Pani, chi fai parti du criatu,  
Nzuppatu di fatica e di suduri,  
Tu, chi rappresenti lu Signuri,  
Divisu pi tutti e cunsacratu.

Picchì ti curru appressu e t'assicutu,  
Cu sti ammi stanchi, strata strata,  
La facci sempri supra na balata,  
Strisciannu pi lu munnu ntussicatu?

Scurdannumi lu suli, cercu pani,  
Mmezzu li valanghi e li mineri,  
Piniannu li figghi e la mughieri,  
Pungiutu di li spini disumani.

Quantu fatica c'è p'un pani duru,  
Strisciannu nta li petri e li puntali;  
Mi chiangi lu cori, soffru e suru;  
E cu si godi la fatica mia  
Navica nta lu beni e s'arricrià.

## LA TERRA

Mmezzu lu celu, lu sulì, lu mari,  
Cc'esti la terra, stu granni splinduri.  
L'acqua chi la veni a rinfriscari,  
Lu sulì ci manna lu caluri.

Nasci na pianta, di milli culuri,  
L'armaluzzi la stannu a cattigghiari.  
L'assistenza di lu Patri Criaturi,  
Cu l'occhiu, vigghia, senza mai stancari.

E l'omu, cu la sua ntelligenza,  
Ricogghi, richianta e simìna,  
Scegli l'innestu, la simenza,  
E la scanza di l'erva e la risìna.

Quannu ricogghi, tuttu filìci,  
Chinu di stentu e di sururi,  
Lu Parrocu l'accogghi e binidìci:  
Sia ludatu lu Patri Ridinturi!

A LU DEFUNTU PUETA  
GIUSEPPE CULCASI DA PACECO

A Pacecu c'è n'arvulu stimatu  
Grossu, raricatu e pampinutu,  
Vecchiu, siculari e arraccamatu,  
Ogni annu duna granni contributu.  
Lu fruttu sparsu ntra lu parintatu  
Nna qualchi vicchiottu, ch'è saputu,  
Fruttu riccu d'arti e fantasia,  
Di st'arvulazzo ch'è la puisia.

St'arvulazzu ch'è sempri primavera,  
Chinu di granni nomi, valurusu,  
Nittu BASIRICO', Tuzzu BARBERA,  
Ntoni RACCOSTA pueta famusu,  
Ninu MURUSU di granni liquera,  
Peppi CULCASI lu silinziusu,  
Lassau li versi chiu culossi,  
L'hannu cunsirvati li chiù grossi.

Spissu lu va trovu o Cimiteru,  
Guardu la so tomba, assai garbata.  
A lu pueta forti, chiù sinceru,  
Du Cumuni mai na cummemurata.  
Quantu Autorità si divirteru,  
Scurdaru la via e la cuntrada,  
Ni ludanu la granni ntilligenza,  
Pi na ricurdanza nuddu chi ci penza.

## LU TIRRMOTU

Guardu cu st'occhi chini di turruri,  
Dispirazioni di li sinistrati,  
Misi sutta li tendi, strati strati;  
Lu chiantu ruttu di li puvireddi,  
Rassignati a la vuluntà di Diu;  
A stà povira genti marturiata  
Puru la matri terra li tradìu!

St'autru turrimotu ci vulìa:  
Distruzioni, petra su petra,  
Macchi di sangu sutta li cantuna,  
Li morti ristarù a munzidduna.  
Giuvini, vecchi e picciriddi,  
Strutti di lu travagghiu e di lu sonnu,  
L'occhi spalancati di dda notti  
Nun vittiru cchiù luci di lu iornu.

L'annu millinovicentusessantottu,  
Lu quinnici d'innaru, e tri di notti,  
La terra trantuliau forti forti,  
Causannu misiru scunfortu.  
Epicentru Salaparuta e Gibillina,  
Disastrata Santa Marghirita,  
Muntivagu distruttu nzanu,  
Lassannu nta lu cori na firita.

Semidistrutti Partanna, Poggioriali,  
Santa Ninfa cu Castelvetro,  
Salemi ia cadennu pianu pianu,  
Calatafimi, Vita, Campuriali;  
Quantu paisi nta l'Agrigentinu,  
Altrittanti nta lu Palirmitanu;  
Scossu Trapani cu Munti San Giulianu.  
Nun ci fu dottu e mancu malandrinu,  
Ci foru danni leggi e murtali,  
Pi tutta la Sicilia Occidintali.

Quantu stragi criau stu tirrimotu,  
Nun bastava la chiaia di Missina,  
Ancora morti, ancora cchiù ruvina.  
Tanti manu, chini di caddi e di sururi,  
Chini di spacchi duri nsangati,  
Foru cu li paisi cancellati.

Gridannu: Aiuti, aiutu,  
Lu figghiu persi mmezzu li ruvini,  
Quantu cori strapunciuti di li spini.  
Li vivi cca sunnu puru morti,  
Muti, sturduti nta lu gelu,  
Aspittannu la manna di lu celu.

La manna si partiu nquantità,  
Lu lanciù di la tilivisioni,  
Misi mpena tutti li Nazioni  
Sta Sicilia nstatu di pietà.  
Li macerii di lu latu occidintali  
Smossiru l'amici e li nimici.  
Nta li campi successi un serra serra,  
Li granni aiuti pi mari e pi terra.

La Russia, l'Olanda, l'Inghilterra,  
L'Austria, l'America, lu Giappuni,  
Di lu munnu tutti li pirsuni,  
Giuvini, vecchi e picciriddi,  
Tutti uniti, vicini e luntani,  
Pi sti poviri sinistrati siciliani.

Curriù mmezzu di li sinistrati  
Lu Prisedenti chinu di buntà,  
Vinni a purtari la sulidarietà.  
Vinni Moru e autri Diputati,  
Nenni, La Malfa, vinniru vigliardi,  
Prestu riuneru lu cunsigghiu,  
Subitu stanziaru li miliardi.

E tu, sinistratu, mutu mutu,  
Cu l'occhi ancora chini di turruri,  
Ti resta di prigari lu Signuri  
E l'Angiuliddu, pi nvucari aiutu.  
Tutti sti murticeddi arrivisciuti  
Preanu pi l'anima e la saluti.